



Павелнің Титке пічии

Тимофейге пастағы пічинөк чіли, пу пічікті Павел Римдегі пиктег-дең позаанында, 65 чылда пасхан полар.

Тит Павелнің чағын полысчызы полған. Павелні Коринфтегі христиан тигірибінен чарастыраында аның үлүзі улуғ. Павел Титті Крит олтырыхта христианнарның наа тигірибінде устағчаа халғыс салған. Пічікте үс өбн сағыс: 1) христиан тигірибінің устағчызы хайдағ поларға кирегіненер; 2) тигірибнің аймах пөліктерінің араласчылары хайди тудынарға кирегіненер; 3) Иисус Христостың сын үгрединің төстеглеріненер.

Алғас

1 Павел – Худай хулы, Иисус Христостың илчізі^с. Мин Худай таллааннарға киртініс читірерге, оларны сынға паза Худайның көнніне чарапчатхан чуртасха үгредерге ызылғам. ²Минің үгредиим мөгі чуртасха^с ізеніс пирче. Пу чуртасты чойны пілбес Худай тустар пасталғалаххаох молчаан. ³Че Позы таллаан туста сөсті чарлааны хоостыра аны асхан. Аны чарлиры мағаа Худай Арачылағчыбыстың чахии хоостыра пирилген.

⁴Титке, пір киртіністе сын оолғыма – Худай Пабабыстаң паза Арачылағчыбыс Хан-пиг^с Христос Иисустаң паарсас, айағ паза амыр хоных сағаа.

Титтің Крит олтырыхтағы тоғызы

⁵Мин сині Крит олтырыхта читіре иділбеен тоғысты тоос саларға паза прай саарларда мин чахаанни тигіриб^с ах сағаллары^с турғыс саларға халғыс салғам. ⁶Олар пырозы чох, ипчізіне

киртістіг*, сайбах алай тообас тіп тігірбинчеткен, киртіністіг палалығ кізілер ползыннар. ⁷Тигірибнің устағчызы, Худай ибіннің пүдірігчізі полчатханнаңар, пырозы чох поларға кирек. Хазыр нимес, табырах өкпеліг нимес, ізеечі нимес, кізее хол теертпес, чабды нимес, ⁸че аалчы көреечі, чахсы нима идерге күстенеечі, пазымның, арығ чүректіг, арығ хылыхтығ ползын, посты тудын пілзін. ⁹Ол Худай сөзінең чарасчатхан ізестіг үгредіг хоостыра тудынарға кирек. Андада ол пасхаларын орта үгредіге көстир, тоғырланғаннарның алчаастарын, тізең, іле сығарар.

¹⁰Тообастар, тик чоохтығлар паза чойлар көп нооза улам иудейлер^с аразында. ¹¹Андағларның аастарын чабарға кирек: арығ нимес парыс алар үчүн чарабас нимее үгредіп, олар пүкүл иблерні сайбап салчалар. ¹²Оларныоң аразынаң пір кибелчі чоохтабады ба за: «криттегілер чир чойлар, аң сині чабаллар, арғаастар паза тоспас харыннар». ¹³⁻¹⁴Пу сын киречілес.

Аннаңар оларны хатығлап, киректерін ілезіне сығар тур: киртіністері пик ползын, кізілерні сын үгредігден хыйа апарчатхан иудей кип-чоохтарына паза кізілернің чозахтарына хайығ салбазыннар. Олар тіпчелер: ¹⁵«Арығларға прай нима арығ, кірліглерге паза киртініс чохтарға пір дее арығ нима чоғыл». Че оларның постарының сағыстары кірліг, чахсы-чабалны онаарары даа сайбалча. ¹⁶Олар Худайны пілчебіс тидірлер, че киректері пастыра чабал, тообас паза пір дее чахсы кирек ит полбас пол парғаннаңар, Худайдан хыйа турчалар.

Хайди тудынардаңар устағлар

2 Син орта үгредіге килісчеткен нимелерні чоохтап одыр: ²апсаhtar сах сағыстығ, улуғлатчатхан, пазымның ползыннар, киртіністе, хыныста, тыстаныста пик тудынзыннар. ³Инейлер ідөк, ах-арығларның ондайынча тудынарға киректер, хоп чайбасха, іскее сабылбасха, чахсаа үгредерге. ⁴Олар чиит ипчілерні ирлеріне, палаларына хынарға, ⁵пазымның, ах-арығ^с поларға, иб-чуртха салынарға, чағбан чүректіг поларға, ирлерінің чооғын истерге үгретсіннер. Андада Худай сөзі хомайлалбас. ⁶Постаң оолларны пазымның поларға алда. ⁷Позың прай нимеде, чахсы киректерде көзідім пол. Үгретчетсең, прай чүреенні салып, сын

* ^{1:6}Грек тілінде пу сөстерні үс пасхали онаарарға чарир: 1) ипчізіне киртістіг, 2) ипчізінең хақан даа чарылбаан, 3) пір ле ипчінің ири.

ондайлығ паза арығ пол. ⁸Синің сөзің пір саба ниме чох, орта ползын. Ыырчы, пістенер хомай ниме тирін таппин, уйатха кірзін. ⁹Хуллар, эелеріне тоғырланмин, оларның чоохтарын истіп, көннелерінче ползыннар, ¹⁰оғырлабазыннар. Че ноо даа нимеде постарын киртістіг паза чахсы көзітсіннер. Андада олар Арачылағчы Худайыбыстың үгредиин постарынаң чазирлар.

¹¹Прай кізілерні арачылап полар Худайның паарсазы чит килді нооза. ¹²⁻¹³Ол паарсас пісті, Худайы чох хоныхты паза чуртас хынығыстарын тасты, пазымнығ, сынчых, Худайны улуғлап, пу ах-чарыхта чуртирға үгретче. Піс, анзына үгреніп, ізенчеткен часкалығ күнібісті сағып чуртирға кирекпіс. Андада илбек Худайыбыс паза Арачылағчыбыс Иисус Христостың сабланызы азылар. ¹⁴Ол, пісті хайдағ даа чабал киректең ал халар паза ах-арығ чон ит салар үчүн, Позының тынын пир салған. Амды піс Аның чоныбыс паза чахсы киректер идерге салынчабыс.

¹⁵Анзын сағаа пирілген үлгүннең чоохта, алда, ілезіне сығар. Сині пирдезі ниме салбин полбазын.

Орта киректер итчет

3 Кізілерге, пастыхтарның паза үлгүлернің ондайынча полып, оларның чоохтарын истерге, ноо даа чахсы кирекке тимде поларға, ²ачығ тілге салынмасха, перінмеске, амыр тудынарға, прай кізее чахсы хылынарға чоохтапчат. ³Хачан-да піс тее, ырах сағынмин, сөс испин, астых чөрген полғабыс. Хычаланыстарға, чуртас хыниина салынған хуллар полғабыс, чабалласта, істі чохтаныста, удур-гөдір хырт көрізіп чуртаабыс. ⁴Хачан, тізең, Худай Арачылағчыбыстаң паарсас паза кізее хыныс түскенде, ⁵Ол пісті арачылап халған. Піс поэыбыс иткен сын киректерібіс үчүн нимес, че пісті айааны үчүн. Ол пісті чуупчатхан Худай Худынаң пастыра арачылаан. Пу Хуттың чуғаны піске наа тын кирче, наа чуртас пирче. ⁶⁻⁷Піс, Иисус Христостың паарсазынаң ахтанып алып, мөгі чуртасха ізеніс аларыбыс үчүн, Худай піске Иисус Христос Арачылағчыбыстың пастыра Худай Худын айағ чох урған. ⁸Пу сын сөс.

Худайға киртінчеткеннер чахсы киректер идерге күстенер үчүн, сині пу сөстерге оларны үгретсін тіп сағынчам: анзы кізілерге чахсы паза тузалығ. ⁹Тик марығлардаң, өбекелер санастыраынаң, таластардаң паза Моисей Чахиинанар^c тартыстардаң оортах пол, олар тузазы чохтар, тиктер. ¹⁰Тигіриб чарчатхан

кізіден, пір-ікі хати оңарылдырған соонан, хыйа парыбысчат.
¹¹ Олар ардаан кізілер полчатханын піл: оларның чазыхтары^c
оларның пырозын киречілепче.

Кізілерге чахығлар паза чолабиттер

¹² Хачан Артеманы алай Тихикті синзер ыссам, син минзер, Никополь саарзар, кил парарға күстенібіс – мин анда хыстирға пөгінчем. ¹³ Ұлгү пілігцізі Зинаны паза Аполлосты чолға чахсылаан тимнеп сал: пір дее нимеден хызылбазыннар. ¹⁴ Пістіңнер дее, тик чөрбес үчүн, сығысхан кирексіністерін толдырар үчүн, чахсы киректер идерге үгрэнзіннер. ¹⁵ Миннең хадалары прайзы сағаа чолабит ысчалар. Писке киртінізібісте хынчатханнарны прайзын алға. Сірерге прайзыңарға Худай паарсазы ползын. Аминь^c.